

PROCESO SELECTIVO CONVOCADO PARA CUBRIR TRES PRAZAS DE TÉCNICA/O MEDIO DE ADMINISTRACIÓN XERAL, QUENDA PROMOCIÓN INTERNA (CPI2024M)

2º EXERCICIO

CASO PRÁCTICO

O 10 de febreiro de 2024 o centro xestor ao que vostede está adscrito, competente por razón da materia a tratar, recibe unha solicitude do Concello de Baiona relativa á tramitación dun Convenio de colaboración a asinar entre a Deputación Provincial de Pontevedra e o Concello para a celebración da Festa da Arribada da Carabela Pinta 2024, que terá lugar os días 1, 2 e 3 de marzo de 2024.

A devandita solicitude o Concello acompaña o borrador da proposta de Convenio, a memoria explicativa da finalidade a realizar, o orzamento, a declaración responsable de non estar incurso en supostos de prohibición para recibir subvencións e a certificación de estar ao corrente coa facenda do Estado, Comunidade Autónoma, Deputación de Pontevedra e Seguridade Social.

Á vista de dita solicitude, analice o contido do Convenio e emita informe-proposta respecto de todas as cuestións que considere relevantes para a súa tramitación, incluídos os erros e/ou omisións que poida conter, de ser o caso, e sobre a súa viabilidade xurídica (7,50 puntos)

Así mesmo, informe sobre cal sería o órgano provincial competente para aprobar dito Convenio e se é obrigada ou non a publicación do mesmo no BOPPO e na páxina web, razoando a resposta en ambas cuestións (2,50 puntos)

CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE BAIONA PARA A CELEBRACIÓN DA FESTA DA ARRIBADA DA CARABELA PINTA 2024

En Pontevedra, na data indicada ao marxe

REUNIDOS

Dunha parte, D. Luís López Dieguez, en calidade de Presidente da Deputación Provincial de Pontevedra, NIF P-3600000-H, en virtude do acordo plenario, de 6 de xullo de 2023 e das potestades que lle confire o artigo 33.2.b) da Lei 7/1985, de 2 de abril, de Reguladora das Bases do Réxime Local, con domicilio no Pazo Provincial na Avda., Montero Ríos s/n de Pontevedra, actuando en calidade de Presidente da Deputación de Pontevedra.

Doutra parte, D. Jesús Vázquez Almuíña, Alcalde do Concello de Baiona, N.I.F. P- 3600300B, por acordo plenario de data 17 de xuño de 2023 e no exercicio das potestades que lle confire o artigo 21.1.b) da Lei 7/1985, de 2 de abril, Reguladora das Bases de Réxime Local.

D. Carlos Cuadrado Romay, Secretario da Deputación Provincial de Pontevedra, actuando como fedatario público do presente acto.

As partes recoñécense entre si capacidade xurídica suficiente e poder bastante para obrigarse neste Convenio de colaboración e, a tal efecto,

EXPOÑEN

Primeiro. A vila de Baiona reivindica ano tras ano ser o primeiro porto da Europa Occidental en ter coñecemento da existencia doutro continente, doutra cultura e doutras xentes. A carabela A Pinta arribou en Baiona o primeiro de marzo de 1493 mentres que a Niña arribou a Lisboa o 4 de marzo de 1493.

A festa da Arribada celebrárase o 1, 2 e 3 de marzo de 2024. Dita celebración supón un incremento de persoas e visitantes moi importante que permite desestacionalizar o turismo cunha oferta de actividades culturais, lúdicas e deportivas durante os tres días que dura a festa. Prodúcese tamén un incremento de reservas nas prazas hoteleiras e nas empresas de servizos da Vila.

Segundo consta na memoria presentada polo Concello de Baiona, durante os días que dura a festa, o casco antigo baionés transformárase nun burgo medieval, transportando aos seus visitantes e turistas ao medievo onde atoparán unha multitude de actividades lúdicas e de lecer.

Colocaranse elementos propios do medievo no casco histórico artístico da vila como postos de venda ambulante, tenderetes propios do Concello, toneis, palla nas rúas, rótulos e sinais medievais, cordas, redes e outros aparellos tradicionais.

Esta festa conta cun innegable atractivo histórico e cultural para constituírse nun pulo de atracción turística da provincia de Pontevedra e consta coas seguintes declaracións oficiais:

- Festa de interese turístico de Galicia, outorgada pola consellería de Cultura, Comunicación social e Turismo da Xunta de Galicia e publicada no DOGA nº 131 de 9 de xullo de 1999.

- Festa de interese turístico nacional, outorgada por Resolución Ministerial do 23 de setembro de 2010 da Secretaría Xeral de Turismo e Comercio Interior, publicada no BOE nº 241 de 5 de outubro de 2010.

Festa de interese turístico internacional, outorgada por Resolución Ministerial do 27 de decembro de 2015, da Secretaría de Estado para o Turismo, publicada no BOE nº 269 de 10 de novembro de 2015.

Segundo. De conformidade co previsto no artigo 26.1.d) da Lei 7/1985, de 2 de abril, de Bases do Réxime Local, a Deputación de Pontevedra ten competencia no fomento do desenvolvemento económico e social, de acordo coas competencias das demais Administracións Públicas, neste ámbito.

De conformidade co previsto no artigo 25.2.h) da Lei 7/1985, de 2 de abril, de Bases do Réxime Local os municipios teñen competencia sobre a información e promoción da actividade turística de interese e ámbito local.

Terceiro. As partes asinantes coinciden na conveniencia e necesidade de xuntar esforzos e impulsar dende o ámbito das súas competencias as iniciativas, programas, proxectos e accións conxuntas dirixidas a impulsar e mellorar o patrimonio e o turismo da provincia.

En consideración a todo isto, é vontade das partes asinantes a colaboración de acordo ás seguintes

CLÁUSULAS

PRIMEIRA - OBXECTO DO CONVENIO

Constitúe o obxecto deste convenio regular as condicións de colaboración entre a Deputación de Pontevedra e o Concello de Baiona para a promoción da Festa da Arribada da Carabela A Pinta a Baiona 2024, a celebrar durante os días 1, 2 e 3 de marzo de 2024.

SEGUNDA - COMPROMISOS DO CONCELLO DE BAIONA

O Concello de Baiona comprométense a desenvolver e celebrar a Festa da Arribada da Carabela A Pinta a Baiona 2024, durante os días 1, 2 e 3 de marzo de 2024, na vila de Baiona e, en particular, a cumprir as obrigas relacionadas no artigo 14 da Lei 38/2003, de 17 de novembro, Xeral de Subvencións e en particular:

- Presentar en forma e prazo a xustificación.
- Difundir a colaboración outorgada pola Deputación de Pontevedra. Para elo, deberá incluír o logotipo da Deputación de Pontevedra no material gráfico publicitario utilizado e deberá ter mesma relevancia que as medidas de difusión realizadas para outros entes cofinanciadores da finalidade subvencionada.
- Pagar aos seus acredores durante o período de realización da finalidade subvencionada.
- Comunicar calquera eventualidade ou circunstancia que altere ou dificulte o desenvolvemento da finalidade subvencionada co obxecto de que, de estimarse con suficiente anterioridade, poida modificarse tanto o contido e a contía da finalidade subvencionada coma a súa forma e prazos de execución e mais a xustificación dos correspondentes gastos.
- Comunicar a circunstancia producida cando, debido á acumulación de subvencións ou axudas recibidas para o mesmo fin, o conxunto destas supere o custo total da actividade subvencionada, caso no que o importe da subvención deberá ser obxecto de modificación.
- Someterse ao control financeiro da subvención concedida, nos termos establecidos no artigo 31 da Ordenanza Xeral de Subvencións da Deputación de Pontevedra aprobada polo Pleno da Deputación de Pontevedra na súa sesión ordinaria do 28 de outubro de 2016 e publicada no BOPPO nº 249 do 30 de decembro de 2016.

TERCEIRA – COMPROMISOS DA DEPUTACIÓN DE PONTEVEDRA

A Deputación de Pontevedra colaborará coa actividade para a celebración da Festa da Arribada da Carabela A Pinta a Baiona 2024 mediante unha achega por importe de 8.000,00 € para sufragar os gastos derivados da organización de dita festa a celebrar durante os días 1, 2 e 3 de marzo de 2024 na vila de Baiona.

Consideraranse gastos subvencionables os necesarios para o desenvolvemento da actividade realizados entre o 1 de xaneiro e o 31 de decembro do ano en curso, aínda que foran realizados con anterioridade á sinatura do convenio.

Aceptaranse desviacións máximas dun 35% nos diferentes conceptos de gastos subvencionables con respecto ao orzamento inicial.

CUARTA - ORZAMENTO E FINANCIAMENTO

O orzamento máximo ascende a 8.155,40 €, desagregado da seguinte forma:

Gastos de publicidade: 4.840,00€

Deseño gráfico: 3.315,40 €

TOTAL (IVE incluído) 8.155,40€

A subvención de oito mil euros (8.000,00 €) figura como nominativa no orzamento da Deputación de Pontevedra para o ano 2024 e será financiada con cargo á aplicación orzamentaria 24/433.4320.462.04 (Subvencións a Entidades Locais - Festas). A subvención supón o financiamento do 98,09 % do importe total do orzamento da actividade.

QUINTA - XUSTIFICACIÓN DA SUBVENCIÓN

O Concello de Baiona deberá presentar, no prazo de tres meses dende a realización da actividade, a seguinte documentación:

I. Xustificación do cumprimento da finalidade para a que se concedeu a subvención:

a. Memoria explicativa e detallada da realización da finalidade, con expresa mención dos resultados obtidos (comprensiva no seu caso do programa, cartel anunciador, fotografías e demais documentación gráfica elaborada en/ou para o desenvolvemento do proxecto ou actividade subvencionada).

b. Acreditación do cumprimento de dar difusión ao financiamento obtido.

c. Xustificación do cumprimento doutras obrigas impostas.

d. Se fose posible, indicación de se se cumpriron os obxectivos propostos.

II. Xustificación dos gastos:

a. Conta xustificativa dos gastos, na que se determinará o custo ou gasto total da finalidade subvencionada, detallando as facturas ou documentos con valor probatorio no ámbito mercantil e administrativo (identificando: acredor e documento, importe, data de emisión e, se é posible, data na que se pagou; información, no seu caso, das desviacións con relación ao orzamento que serviu de base á concesión).

Os gastos realizados na finalidade subvencionable e que figuren na conta xustificativa serán aboados polos beneficiarios preferiblemente antes da presentación da xustificación da subvención, pero, en todo caso, deben ser aboados no prazo máximo de un mes dende a percepción dos fondos.

O gasto non pagado ou pagado fóra deste prazo non se considerará subvencionable.

b. Xustificación con facturas ou documentos análogos con valor probatorio no ámbito mercantil e administrativo dos custos ou gastos debidamente conformadas (co "Recibín" da persoa beneficiaria da subvención e o selo do acredor; este último se fose posible), polo importe da subvención concedida; indicando para cada factura ou documento análogo: o número de unidades, o prezo unitario destas e o custo total de cada unidade, excepto no caso previsto no apartado "d" para as administracións públicas, no caso contrario non será considerado como gasto subvencionable.

c. Declaración responsable de que os gastos que figuran na conta xustificativa se aplicaron á finalidade subvencionada. Así mesmo, indicárase que o resto de xustificantes da conta se encontran no domicilio da persoa beneficiaria a disposición da Deputación para o seu exame.

d. No caso de administracións públicas (no caso de subvención para actividades) poderase aceptar a certificación do/da secretario/a ou interventor/a (ou funcionario/a competente) acreditativa de que os gastos cuxo detalle figura na conta xustificativa son reais, se aplicaron á finalidade subvencionada e foron aprobados polo órgano competente, quedando a disposición da Deputación para o seu exame e, se considera oportuno, os xustificantes correspondentes.

III. Xustificación dos ingresos:

a. Detalle do financiamento obtido para a finalidade subvencionada (indicando entidades, organismos, particulares, etc.).

b. Financiamento propio.

c. Declaración responsable de que os ingresos ou recursos alleos obtidos non superan o custo ou gastos da finalidade subvencionada.

O incumprimento das obrigacións de xustificación levará consigo a perda da subvención.

No caso de que se xustifiquen gastos inferiores ao 100% do orzamento subvencionado aboarase a parte proporcional da subvención.

O pago da subvención farase unha vez se aprobe a xustificación e non se contemplan pagos a conta ou anticipados.

SIXTA - COMPENSACIÓN DE DÉBEDAS

No caso de que o beneficiario da subvención teña débedas coa Deputación de Pontevedra, estas serán compensadas co crédito recoñecido no momento de aprobación da xustificación da subvención.

SÉTIMA - COMPATIBILIDADE CON OUTRAS AXUDAS

A subvención concedida pola Deputación de Pontevedra será compatible con outras subvencións, axudas, ingresos ou recursos para a mesma finalidade, procedentes de calquera outras Administracións ou entes públicos ou privados, nacionais, da Unión Europea ou de organismos internacionais, pero en ningún caso a contía total das subvencións poderá superar o custo real da

actividade subvencionada. A tal efecto, en canto se teña coñecemento da obtención doutras subvencións para a mesma actividade, o beneficiario deberá comunicarllo á Deputación de Pontevedra.

A subvención concedida é compatible coa axuda que se puidera conceder por outros Servizos da Deputación de Pontevedra dentro da convocatoria do Plan de Obras e Servizos (Plan Concellos) para a mesma finalidade no mesmo exercicio.

OITAVA-VIXENCIA DO CONVENIO

Este convenio entrará en vigor ao día seguinte da súa sinatura e estenderá a súa vixencia ata o remate dos compromisos contemplados na cláusula segunda e, en todo caso, ata o 31 de decembro de 2024, sen prexuízo do sinalado na cláusula terceira respecto dos gastos subvencionables.

NOVENA – MECANISMOS DE SEGUIMENTO, VIXILANCIA E CONTROL

A Deputación de Pontevedra establecerá mecanismos de seguimento, vixilancia e control da execución do convenio e dos compromisos adquiridos polas partes asinantes do mesmo. Ditos mecanismos resolverán os problemas de interpretación e cumprimento que puideran exporse respecto dos convenios. Todo isto en cumprimento do establecido no artigo 49.f) da Lei 40/2015, de 1 de outubro, de Réxime Xurídico do Sector Público.

DÉCIMA - NATUREZA XURÍDICA E XURISDICIÓN COMPETENTE

Este convenio ten natureza administrativa, sendo competente para entender dos litixios que puidesen xurdir respecto da súa interpretación e execución á xurisdición contencioso - administrativa.

Para o non disposto no presente convenio contemplarase o establecido na Lei 38/2003, de 17 de novembro, xeral de subvencións, na Lei 9/2007, de 13 de xuño, de subvencións de Galicia, na Ordenanza Xeral de Subvencións da Deputación de Pontevedra aprobada polo Pleno da Deputación de Pontevedra na súa sesión ordinaria do 28 de outubro de 2016 e publicada no BOPPO nº 249, do 30 de decembro de 2016, e demais normativa de pertinente aplicación.

Así mesmo, rexeráse pola Lei 40/2015, de 1 de outubro, do Réxime Xurídico do Sector Público e polas demais normas de dereito administrativo e, no seu defecto, polas normas de dereito privado.

DÉCIMO PRIMEIRA - RESOLUCIÓN

O presente convenio resolverase polo incumprimento total ou parcial dalgunha das cláusulas que o regulan.

E, en proba de conformidade, asinan o presente convenio de forma dixital na data indicada á marxe.